

Alle Jahre wieder: Wéi Dir jo all wësst fueren mir bei de Scouten nëtt nom Kalennerjoer, mais nom Scoutsjoer, dat sëch um Schouljoer orientéiert. Mein Apercu z'Joert op der Generalversammlung hat mat der Summervakanz 2009 opgehal. Duerfir wëll ech Iech elo hei, an der nämlecher Logik, en Iwerbléck ginn, iwert d'Aktivitéiten vun eisem Grupp am Scoutsjoer 2009/2010.

D'Scouts-Joer 2009/2010 bei de Scouten St. Martin Duelem

- Mëttwochs de 16ten September war den **LGS-Kongress** zu Hesper op deem eise Grupp mat 5 Cheffen vertrueden war fir déi nei Saison um Verbandsniveau administratif ze beobachten a matzegestalten.
- Sondes den 20ten September 2009 waren d'Cheffen aus dem ganze Land nees op den **LGS-Cheffdag** agelueden, fir do déi nei Konsignen vum Verband fir déi nei Saison ze kréien. Eng grouss Delegatioun vun eisem Grupp, huet dess Invitatioun ungehollt an ass am grénge Hiem op Beggen gefuer fir do en neit Konzept vum Cheffdag matzerliewen a mat auszeprobéieren.
- Dënschdes den 22te September 2009 haten eis Cheffen eng éischt **Viirbereedungsversammlung**, fir no der Summerpaus déi nei Saison am Grupp viirzebereeden an besonnesch sech fir de Schnupperdag ofzesprieche.
- Samsdes de 3ten Oktober war eise **Schnupperdag 2009**. Fir dëst Joer hate mir un deem méih schlanke Konzept vum Viirjoer festgehalen. Duerfir hu mir d'Kanner am Biber a Wëllefchers-Alter fir dëse Samsdeg an déi normal Versammlung vun der jeweileger Branche invitéiert. Eis ganz Chefféquipe huet déi jeweileg Branchenchefen renforcéiert, an de Kontakt mat den Elteren iwerholl, an esou konnten déi nei Kanner emol richteg an eng Versammlung eraschnupperen, a bei Spill a Spaass materliewen wéi et bei de Scouten zougeet. Ausserdem hate mir fir dëse Schnupperdag eisen LGS-Pätter, de Claude Lamborelle, bei eis invitéiert. Sou konnt hien eise ganzen Trupp beim Asatz erliewen a kenneléieren a vis-à-vis vun den Elteren de Verband vertrieeden a viirstellen. Um Enn vun deem Dag hate mir eng ganz Rëtsch nei Nimm op eise Lëschten. Mir waren also nees gudd an déi nei Saison gestart.
- De WE vum 10 bis den 11ten Oktober waren eis RaRo um Neihaisgen wou mam **WE de lancement** och fir d'RARO déi nei Saison offiziell lassgang ass.
- Sondes den 11ten Oktober 2009 hu mir mat eise Farwen, wéi all Joer, de Cortège an d'Feierlechkeeten zum nationalen **Commemoratiounsdag** an der Gemeng Duelem begleet.
- Samsdes den 31ten Oktober 2009 war nees de Moment komm op deem eng Partie **Biber** en 1ten Trëtt op der Scoutscarrière-Leeder eropgeklomm sinn. Hir **Montée** huet sie deen Dag an d'Reihen vun hiren neie Frënn aus der Wëllefchersbranche geféiert.
- Vum 14ten op de 15ten November hu sech **d'Carapio** zu Wëlwerwoltz am Chalet RV ginn. Den Alexandre, de Jo, de Joe an de Michel hun do mat Schmerzen hire Wee an d'Carapio musse sichen. Et ass hinnen ntt liicht gemacht gin, well schon de Wee mam Zuch op d'Platz vun hirer **Montée**. hun sie selwer "musse sichen.
- Vum 21ten op den 22ten November 2009 hu sech dunn och nach d'Raro um Kuelbecherhaff mat hiren neie Kandidaten RV ginn, fir do an engem ideale Scoutskader eng **RaRo-würdeg Montée** ze zélébréieren. Elo waren d'Branchen nees komplet, an déi nei Saison konnt definitiv ufänken.

- Samsdes den 28ten November 2009 hate sech nees eng ganz Reih Kanner a Jonker mat de Cheffen an de gudde Séilen aus eiser Amicale am Home afonnt, fir eis traditionnel **Adventskränztz** färdeg ze maachen an auszeliwweren. Dank dem Annie senger langjähriger Erfahrung a sengem groussen Engagement, hale mir zanter Joeren en héigen esthétesche Standard mat eise Kränztz an. Eng trei Klientel déi eis Kommandebicher ëmmer nees fëllt ass be bäschte Beweis duerfir.
- Den nächsten Dag, den 1ten Adventssondeg war nees **porte ouverte beim Buttek Mosaik** zu Fëlschdreff. E Grupp vu Cheffen huet et sech zur Eieresaach gemacht, hei d'Scouten am Kader vun enger grousser Kollektiver BA ze vertrieeden. Esou ware mir och dëst Joer nees mat eiser Gromperekichelchersbud um Posten fir eise Stengchen an dee grousse Mosaik anzebréngen.
- Samsdeg de 5ten Dezember 2009 war dunn nees eng weider lass zu Duelem am Home. Dank dem José senger Initiative konnte mir de **Kléschen** verpflichten, eng Visite mam Housécker bei eise Kanner vun Biber an Wëllefcher ze maachen, déi deen Daag jo hir Versammlungen haten. Besonnesch bei de klenge Biber ass den hellege Mann mat ganz vill Ehrfurcht empfangen ginn. Hire schéine Gesank huet den hellege Besuch selbstverständlech och mat enger Tiitchen fir déi brav Kanner a Cheffen belount. A laut de Bibercheffen hun sech eng Reih vun hire Kanner déi Remarken, déi de Kléschen hinnen perséinlech gemacht hat zu Härz gehollt. D'Gestreids an d'Klappereien hätten duerno deitlech ofgehollet. Mir missten dee gudde Mann mol méih dacks ruffen.
- De 14ten Dezember hu mir gehollef d'Krëppchen an der Duelemer Kiirch op hir Plaaetz ze transportéieren. Nom Pater sengem Wunsch déi Krëppchen anescht ze gestalten, ware mir frouh, d'Charge vum Plangen an Zesummenbauen vun der **Krëppchen** un gudd an engagéiert Leit weiderzeginn, mais mir stinn weiderhin bereet, den Op- an Oftransport vun der Krëppchen ze garantéieren.
- Donnegdes de 17ten Dezember 2009 sinn eis Cheffen mat enger ganzer Retsch vun eisen Avex a Pionéier owends, op Grousbous gefuer, fir do d'Friddenslicht 2009 sichen ze goen. D'Grousbousser Scouten waren dat Joer op Wien déi Flaam siche gewiecht. An enger beandroekender Veillée hu sie sech och getraut ze soen, dass et **d'Friddenslicht vu Betlehem** ass, also dem Jesus sei Liicht, an nëtt irgendeng politesch korrekt, neutral an harmlos SYMBOL-Liichtchen, als déi se déi läscht Joeren ze oft duergestallt gin ass.
- An der Krëschdagsvakanz, vum 22ten op de 24ten Dezember 2009 sinn eis Avex a Carapio zesummen op Réiser op de **Wantercamp** gefuer. Sie haten hire Programm, ënnert dem Thema „Pirates of the Caribbean“ esou organiséiert, datt sie op helleg Owend am Nomëtteg nees zu Duelem waren, fir vun do aus eeler a krank Mënschen an eisen Dierfer ze besichen. Sie hun an all Haus wou sie waren, an op etleche Griewer um Kierfecht, eng Käerz mat der Flaam vu Betlehem hannerlooss fir de Mënschen Hoffnung ze maachen an, an der daischterer Joereszeit vum Jesus ze schwätzen deen d'Liicht vun der Welt ass, an deem sein Antrieden an eis Welt op deem Dag jo gefeiert gëtt. Um Enn vun der Familjemass hun eis Kanner nach am Ausgang vun der Kiirch allen Interesséierten e farwegt Gliessen mat enger Käerz an dem Liicht vu Betlehem geschenkt.
- Och nach op **helleg Owend** haten e puer vun eise Cheffen um Parvis vun der Duelemer Kiirch en Zelt opgeriicht, ënnert deem d'Fra'en a Mammen no der Familjemass owends, Glühwein a Krëschdagsgebäck verschenkt hun. Fir déi richteg Stëmmong opkommen ze loosse, hun e puer vun eise Memberen, déi och an der Musek sinn, Krëschdagsweisen dobei gespillt.
- Dëschdes den 12te Januar 2010 hate mir eis Memberen, eis Frënn a Bekannten an d'Gemengenverantwortlech fir eis **Generalversammlung** an den Home invitéiert. D'Présentatioun vun engem ganz opulenten Aktivitéitsrapport, an enger gesonder a korrekter Keesesituatioun, hun domat no baussen fir déi gebueden Transparenz gesuergt. Gleizeitig war et och d'Passation des pouvoirs beim Amt vum Késsier, wou de Raymond Watgen vum Tim Seil beirft gin ass. Dem Raym nach op dëser Plaaetz e ganz décke Merci fir deen langjähregen Asatz am Dëngscht vun eiser Kees an domat vun eiser Gemeinschaft!!!!

- Fir Samsdes den 20te Februar 2010 haten d'Cheffen sech an den Explorer RV beim Home gin, fir op Buergsamsdeg **Fakelen** ze maachen, déi deen Owend zu Fëlschdref an den Dag drop owends zu Duelem bei de jeweilegen Fakelzich beim **Buergbrennen** zum Asatz koumen. Et ass dest eng flott Gelegenheit fir eis, eis gudd Relatiounen mat aneren Vereiner aus der Gemeng ze pflegen an, duerch eis Präsenz no baussen Reklamm fir eis Faarwen ze maachen.
- De WE vum 27. Op den 28te Februar 2010 waren eis Pio'en mat enger neier Aktioun beschäftegt. Um **Funkraid** zu Erpeldange hun sie an der Nuecht eng Aart téléguidéierte Rally materlieft.
- Fir Sondes de 7te März hate mir e muskléierten Optrëtt an der Coque beim **relais pour la vie** organiséiert. Vun 8 Auer Moies, bis 20:00 Auer owends hun an 8 Equippen vun eis, 53 LEEFER, Kanner, Cheffen, Amicale an Elteren, zesummen 753 Tiir, also ongeféier 150 km gelaaf. Nieft dem Startgeld vun de LEEFER, dat der fondatioun contre le cancer zoukomm ass, haten eis LEEFER sech zesummen 183 Sponsoren gesicht, déi sech engagéiert haten, déi gelaafen Tiir mat insgesamt 2.985,4 € ze belounen. Dëss Suen sollten an den Entwécklungshëllefprojet vun den nationalen RaRo'en am Summer am Vietnam fléissen, fir deen eng 6 vun eise Frënn bereet stungen, am Summer selwer am Vietnam matanzegreifen. Dat sollt eis B.A. fir de Friden 2010 sinn.
- Turnusgeméiss war 2010 nees **Teaterspillen** um Programm. Duerfir hate mir fir Samsdes den 13te März 2010 der kulturinteressierter Welt RV zu Duelem am Centre culturel gin. All eis Branchen haten sech druginn, fir mat hiren Kanner a Jugendlech e variéierte Programm op d'Been ze stellen. Besonnesch eis Biber hun mat dem Max Steichen als rabbelkappege Papagei „Jaki“ ze begeeschteren gewosst. An eis Amicale huet keen Asatz gescheit, fir eis Jugend ze ënnerstetzen andeems sie sech ëm Gedrécks, Bréidercher, Tombola a villes méih gekëmmert hun. Dank dësem kombinéierten Asatz war och eisen Teater 2010 e schéinen Erfolleg.
- Dëschdes de 16te März hate mir an den Home invitéiert, fir bei Gegrills an engem gudde Patt de **17te Gebuertsdag** vum Grupp hellege Mäerten Duelem ze feieren. Als Sahnetüpfelchen goufen et deen Daag och Geschenker, an zwar fir eis, a vun eis. Mir waren ganz frouh, eisen neien Unhänger présentéieren ze kënnen, deen eis Gemeng eis als Extrasubside gestëft hat, nodeems eisen alen Westphalia altersbedéngt nëtt méih ze halen war. Eiser Gemeng en ganz härzleche Merci fir dësen generéisen Akt. Gleichzeitig hu mir awer no baussen op d'Nout vun aneren Mënschen an der Welt gekuckt, an aus eiser Kees en Don iwert 500 € un d' Actioun Avenir Haiti gemacht fir matzehlëfen, d'Suiten vun deem schrecklechen Erdbieben am Januar op Haiti e wéineg ze behiwen.
- Vum 20ten op den 21te März waren eis Carapio um Sennengerbiereg beim **Carapio-WE** vun der **Regionaléquipe** Osten dobei.
- Donnegdes de 25te März 2010 hate mir d'Scouten aus den ënneschte Branchen op Fëlschdrëff an d'Kiirch invitéiert fir do zesummen de **Kraitzwee** op eng kandgerecht Aart a Weis ze goen an ze bieden. Eng ganz Retsch vu Kanner ware mat hiren Täscheluuchten komm, an zesummen hu mir déi eenzel Statiounen vum Jesus sengem Leidenswee entdeckt an hannerfrot.
- Den 28te März hun eis Carapio de Wee op Sandweiler ugetrueden, fir um **JoCaPi**, der journée Carapio, enger Aart Spiel ouni Grenzen-Rally fir all Carapio Truppen aus dem Land deelzehuelen.
- Et ass schon eng Traditioun ginn, dass vun GréngenDonnegdeg owends bis Karfreides owends d'Duelemer Scouten mat enger klenger Equipe ënnerwee sinn, fir an der **Operatioun Getsemani**, dem Jesus a senge batterste Stonnen nozegoen an iwert de Sënn vun sengem Leiden fir eist Liewen nozedenken. Sou waren och dëst Joer den 1ten an 2ten Abrëll e puer Scouten an der Intentioun zesummen, an hun niewt de spirituellen Momenter an dem Jugendkraitzwee vun Fëlschdrëff op Duelem, och nach eis Feierplatz an d'Scoutswiss gebotzt.
- An der Ouschtervakanz, vum 28ten März bis den 2ten Abrëll 2010, haten eis **RaRo** eng ganz besonnesch Erausforderung ungeholt. Zu enger gudder halwer Dosend haten sie sech zu Kandersteg an der Schweiz am internationale Scoutscenter niddergelooss, fir hiren **grousse Camp 2010**. Dobei hun sie

eng 2-Dageswanderung duerch den héichen Schnéi bis op eng Hütt ganz uewen an de Bierger ënnerholt. Trotz Schnéisung a gudder Ausrüstung, war den Opstieg ganz beschwéiert, besonnesch déi läscht 200 Meter. Um Enn vun hirer Kraft sinn sie awer ukomm, an hun sech als éischt am Kollektivdortoir installéiert. Wonnerschéin Biller, eng verbrannten Nues, an dat gudd Gefill; zesummen eng wirklech Grenzerfahrung gemacht ze hun, waren nieft e puer relaxer Deeg fir sie de Gewënn aus dësem Camp.

- Vum 7ten bis den 11ten Abrël stoung emol nees Recyclage um Programm. No dem grouse Succès vun eisem Gruppenrecyclage 2007 am Schwarzwald, hate mir décidéiert eng 2. Editioun Recyclage am Grupp opzeléien. A well d'Laat no 2007 ganz héich louch, an d'Erwaardungen also och entspriechend grouss waren, hu mir probéiert an enger völeg anerer Géigend e frëschen Ulaaf ze huelen. Sou huet eis de Wee an d'Normandie, bei Dieppe an de **Castel d'Ailly** geféiert. 27 Erwuessener a 4 Kanner Cheffen an Amicalesleit hun hei um Mier e puer wonnerbarer Deeg zesummen erlieft. Eng ganz Retsch praktesch an theoretesch Atelier'en, Hike, Geocache, Ausflug a flott Gespréicher hun eis an eiser Formatioun virun bruecht, an hun eis gehollef eng gemeinsam Mëtt ze spieren, an eis Frëndschaften ze verdéiwen. Datt dobei och nach Cheffen vun bal 50 Joer endlech geléiert hun, ordentlech Kravattekniet ze strécken, beweist, datt een bei de Scouten eppes fir d'Liewen léieren kann, egal wéi al een ass.
- Samsdes de 24ten Abrël 2010 hu sech eis Avex a Carapio am Home RV gin, fir .no gemeinsamem Iessen a Schnessen, zesummen duerch d'Nuecht an d'Stadt ze pilgeren fir muerges fréih an der Kathedral, zesummen mat villen aneren Scouten a Jugendlechen, d'Mass vum **Pélé des jeunes** 2010 ze feieren, an domat d'Oktav 2010 richtig anzelauden.
- Sondes den 2te Mee 2010 waren eis Biber um **Bibertreff** am Stadtgronn. De Stanislas huet sie als Aushëllefscheff begleet op hirer Sich no der Melusina. Dat war nämlech den Thema vun deem Bibertreff 2010. No engem lange Parcours duerch d'Stadt voller Spiller an Action, war et eise Biber zesummen mat 150 anere Biber aus dem ganze Land gelongen, genuch Goldstécker ze sammeln, fir d'Melusina freizekafen. Als Belounung gouf et e Pokal an e flotte Badge fir jidfereen.
- Donnegdes de 6te Mee 2010 waren eis Wëllef an der Kathedral bei der Feier vun de **Oktavandacht fir d'Lëtzebuurger Wëllefcher** dobei, an hun esou op hir Manéier d'Muttergottesoktave bereichert.
- Mëttwochs den 12te Mee 2010 war et nees esou weit. Chrishimmelfahrtsdag war do, an domat eis **Scoutskirmes**. Schon Deeg virun ass fleisseg Material op d'Wiss geschleeft ginn, alles sollt jo bereet sinn fir deen groussen Event. Eng allgemeng Talentshow hat eis traditionel Play-backshow ersaat, mais soss hu mir gréisstendeels nom bewährte Rezept geschaaft. Vill fleisseg Hänn hu matugepakt, an esou ass och d'Editioun 2010 fir eis e grouse Succès gin an dat souwuel um finanziellen wéi och um gruppendynameschen Niveau.
- Sondes den 6te Juni 2010 ware mir Scouten mat enger klenger awer iwerzeechter Delegatioun zu Waldbredimus um **Paarfest** a bei der Prozessioun dobei.
- Sondes de 6te Juni hu sech donieft och eis Wëllefcher mat hire Cheffen moies fréih op de Wee gemacht. Sie wollten op Dideléng fueren. Do war 2010 den **nationalen Wëllefchersrally** wou am ganzen 550 Kanner a Cheffen e RV mat Ausserirdeschen hatten. Eng ganz Reih Aufgaben hun d'Kanner mussen léisen, fir dem ET a senge Kollegen ze hëllefen hirt Raumschëff nees un d'Fléien ze kréien.
- Denschdes owends den 22te Juni hu mir Scouten mat eisem Fändel fir 19:00 Auer bei der Gemeng Opstellung gehollt, fir de Cortège, den Te Deum an d'Feierlechkeeten vun der Gemeng fir **NationalFeierdag** matzeerliewen;
- Well eis **RaRo** dëst Joer amplatz vun engem Summercamp, Ouschteren eng gréisser Entreprise zu Kandersteg duerchgezunn hatten, a well hinnen elo am Ufank vum Summer awer e bëschen de Bauch wéih gedon huet, dass keen Camp am Summer wier, hun sie sech, den 2+3. Juli. nom bewährte Schema op **Férange fir en Schaff an Chill-WE** um Jang sein Weier zeréckgezunn.

- An dunn gung et lass mat de Summercamp'en. Vum 19ten bis zum 25te Juli sinn eis Carapio op engem **Low-cost-Summercamp** ënnerwee gewiercht. E camp volant deen sie gréistendeels zu Fouss, bei déckster Summerhëtzt duerch d'Land geféiert huet. Deels hu sie am Bësch bivakéiert, deels waren sie a Jugendherbergen oder zu Gascht op den nationalen Wëllefchers an Avex-Camp'en. Nodeems sie d'Féiss zimlech abiméiert haten, sinn sie op der lëschter Etappe mat Hëllef vun de Gemengendingschter op Férange gefuer, wou sie hire Summercamp um Jang sengem Weier gemittlech auskléngen gelooss hun.
- All eis Branchen huet et eraus gedrängt. Vum 21te bis den 31te Juli hun eis Avex, zesummen mat de Gréivemacher Avex sech op de Wee op Stengefort gemacht, fir do um **nationalen Avexcamp Adventum MMX** 10 Deeg lang Scoutismus vum feinsten zesummen mat enger 800 aneren Scouten aus dem ganze Land ze erliewen. Sou ee grouss Camp kënnen matzeerliewen, ass den Héichpunkt an all Avex-Karrière.
- Och eis Wëllefcher huet et nëtt méih doheem gehalen. Vu Sondes dem 18ten bis Samsdeg den 24te Juli hu sie sech ënnert 800 Wëllefcher aus dem ganze Land gemëscht, fir zu Heischent, am Naturpark Uewersauer, den nationalen Wëllefcherssummercamp **ALTHING 2010** ze erliewen. Thema war hei „d'Wikinger sinn um Stauséi ukomm“. Et goung fir d'Wëllefcher drëms, d'Liewen vun de Wikinger an d'Natur kennenzelieren. An därer Thematik hun eis Kanner an hir Cheftainen, 8 ganz intensiv a flott Deeg kënnen verbréngen. Um Enn waren bei de Cheffen d'Batterien platt an d'Stëmmen hees, awer d'Gewëssheet de Kanner eng emoleg Zeit geschenkt ze hun, huet sie all mat houerger Zefriddenheet erfëllt.
- Endlech, den 28te Juli sinn och eis Biber un de Start gangen. Zu 10 Biber an 3 Cheffen, hu sie sech zu Beefort am Scoutschalet aquartéiert, fir bis den 31ten Juli zesummen de Camp „**Fannt den Nemo**“ ze erliewen. Duerch Bëscher an Hielechten, duerch Reen a Sonn hu sie missten vill Aufgaben meeschteren, bis sie zu gudder Lëscht endlech den Nemo fonnt haten. Déck zefridden sinn sie Samsdeg den 31te Juli zu Fëlschdref um Schampesfest vun der Musek ukomm, wou och eis Avex grad ukomm waren, an hun zesummen mat hinnen den Ausklang vun enger réusséierter Scoutssaison geféiert, bis d'Elteren sie lues a lues siche komm sinn. Elo konnt d'Vakanz ugoen.
- Hat een geduecht! Mais nach war nett alles gelaaf an därer Saison. Ennert dem Motto „**Route 2010 on the move in Asia**“ stoungen eng 30 lëtzebuerger RaRo'en bereet fir am August an den Norden vum Vietnam op Quan Ba ze reesen. Op dem **Camp-Chantier** vum 11-28. August 2010 waren och 6 Jonker aus eisem Grupp dobei, déi op eege Käschten dëss weit Rees gemacht haten, fir ë.a. beim Bauen vun sanitären Anlagen, bei Unlé'en vu Reisterrassen, bei Reboisementsarbechten an beim Zéien vu Waasserleitungen selwer mat Hand unzeléen, fir eng besser a méih gerecht Welt opzebauen.
- Nieft dësen méih speziellen Aktivitéiten gehéieren och nach opgezielt: ëm déi 120 Versammlungen déi d'Scouten vun eisen 5 Branchen zesummen haten, 4 Grupperéit an eng ganz Reih vun Präparatiounstreffen an der Chefféquppen. Et kéint een soen, mir hätten gudd geschafft am Scoutsjoer 2009/2010.